

ZASTUPNIČKA INICIJATIVA

Zastupnik - Hamed Aljović

Prema Agenciji za državnu službu Federacije Bosne i Hercegovine

Inicijativa: „ *Da Agencija za državnu službu pripremi i na svojoj web stranici objavi dokument (uputstvo ili pojašnjenje), načina imenovanja konkursnih komisija za upražnjena radna mjesta državnih službenika, sa Liste eksperata Agencije ali i uopće konkursnih komisija u Federaciji BiH a samim tim i Kantonu Sarajevo. Ovo bi dodatno doprinjelo efikasnosti i transparentnosti rada Agencije* “.

Obrazloženje: Kao poslanik/zastupnik u Skupštini Kantona Sarajevo u proteklom periodu sam postavio nekoliko pitanja prema Agenciji a u vezi eksperata Agencije koji učestvuju u konkursnim komisijama, načinu njihovog imenovanja, kriterijima za imenovanje, učestalosti (broju) imenovanja u konkursne komisije itd. Tako sam na 17 redovnoj sjednici Skupštine Kantona Sarajevo održanoj 28.06.2016. godine postavio pitanje prema Agenciji za državnu službu Federacije BiH, da mi odgovori po kojim kriterijima i na koji način se imenuju eksperti sa liste za učestvovanje u konkursnim komisijama za izbor rukovodećih i ostalih državnih službenika za nivo Kantona Sarajevo. Od Agencije sam dobio odgovor (akt br. 06-05-3-627-2/15 od 26.07.2016. godine) u kojem se navodi da „*Agencija uzima u obzir kriterije akademskog iskustva (stručna sprema za pozicije za koje se vrši izbor), nacionalne pripadnosti i polne strukture.*“ Na prvoj narednoj sjednici Skupštine Kantona Sarajevo (19 redovna sjednica Skupštine Kantona Sarajevo održana 07.09.2016. godine) postavio sam pitanje prema Agenciji da mi odgovori na osnovu čega utvrđuje nacionalnu pripadnost eksperata koji se nalaze na listi eksperata za izbor rukovodećih i ostalih državnih službenika za Kanton Sarajevo. Od Agencije sam dobio odgovor (akt br. 06-05-3-627-3/15 od 27.09.2016. godine) sa kojim **nisam zadovoljan**.

Agencija u svom odgovoru navodi „*Agencija vodi registar državnih službenika FBiH sa svim potrebnim podacima, a na osnovu RDSFBiH, obrazaca utvrđenih u reviziji, a nakon toga na osnovu svakog novog zapošljavanja u organima državne službe, u kojima, između ostalih, postoji i rubrika o nacionalnom izjašnjavanju. Budući da se na svim listama koje je do sada formirala Agencija nalaze državni službenici, njihovu nacionalnu pripadnost moguće je utvrditi uvidom u Registar*“.

Ne znam na koje **liste** misli Agencija ali ako mislimo na Liste eksperata za izbor rukovodećih državnih službenika i Liste eksperata za izbor ostalih državnih službenika objavljenih u „*Službenim novinama Federacije BiH*“ br. 3/15 od 16.01.2015. godine i 34/15 od 06.05.2015. godine onda ovaj podatak Agencije **nije tačan** jer se uvidom u Listu može vidjeti da se među ekspertima ne nalaze samo državni službenici već i **ugledni univerzitetski profesori, uposlenici visokoškolskih ustanova, izabrani i imenovani funkcioneri izvršne i zakonodavne vlasti itd.**, što je logično obzirom da se javni poziv nije odnosio samo na državne službenike.

Također navodim da se iz prijavnog obrasca za prijavu eksperata (obrazac koji sam dobio u prilogu gore navedenog odgovora) se ne može utvrditi nacionalna pripadnost eksperata.

Vjerujem i nadam se da će Agencija podržati moju Inicijativu u cilju efikasnosti, profesionalnosti i transparentnosti rada Agencije i zadovoljstva svih građana FBiH.

Sarajevo; 18.10.2016. godine

Zastupnik

Hamed Aljović